

Banjir di enam negeri

Seri Paduka titah semua pihak patuhi SOP di PPS

Maran: Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah, menitahkan semua pihak termasuk mangsa banjir supaya terus mematuhi prosedur operasi standard (SOP) termasuk ketika berada di pusat pemindahan sementara (PPS).

Baginda bertitah, walaupun berdepan musibah banjir, mangsa perlu menjaga SOP ditetapkan pihak berkuasa, bagi mengelak penularan COVID-19.

"Saya ingin nasihat walaupun keadaan ini susah dan ujian kepada kita, tetapi SOP perlu dijaga. Saya bimbang jika kita tidak ikut SOP, akan berlaku penularan COVID-19.

"Dalam keadaan banjir ini, khususnya di pusat pemindahan, semua harus patuhi SOP. Saya doakan keadaan di sini terus pulih," titah baginda.

Yang di-Pertuan Agong bertitah demikian ketika mencemar duli mendengar Taklimat Bencana Banjir Daerah Maran dan melawat mangsa banjir di Sekolah Menengah Kebangsaan (SMK) Maran 1, di sini, semalam.

Turut mencemar duli, Raja Permaisuri Agong Tunku Azizah Aminah Maimunah Iskandariah

dan Pemangku Raja Pahang, Tengku Hassanal Ibrahim Alam Shah Al-Sultan Abdullah.

Yang turut hadir, Menteri Besar Pahang, Datuk Seri Wan Rosdy Wan Ismail.

Seramai 361 mangsa daripada 56 keluarga ditempatkan di sekolah itu sejak banjir melanda Maran, Jumaat lalu.

Baginda kemudian meninjau keadaan mangsa dan mengurniakan sumbangan kepada semua mangsa yang ditempatkan di PPS berkenaan.

Baginda juga meminta petugas memastikan pengurusan di PPS beroperasi dengan sempurna dan melaksanakan tanggungjawab sebaik mungkin.

"Peranan dan tanggungjawab adalah satu amanah dan tidak sepatutnya dilakukan secara sambil lewa hingga menyulitkan mangsa banjir.

"Saya harap petugas yang ditempatkan di pusat pemindahan sementara melakukan tugas mereka dengan baik dan sempurna, lakukan amanah dengan baik," titah baginda.

Sementara itu, dalam satu kenyataan, Al-Sultan Abdullah menzahirkan rasa simpati kepada



Al-Sultan Abdullah dan Tunku Azizah berkenan meluangkan masa menyantuni mangsa dan menyampaikan sumbangan ketika melawat PPS SMK Maran 1, Maran, semalam. (Foto BERNAMA)

mangsa banjir di beberapa negeri, berikutan hujan lebat berterusan sejak Sabtu lalu.

Baginda turut menzahirkan harapan supaya mangsa banjir khu-

susnya di Pahang, Terengganu, Kelantan, Johor, Perak dan Selangor; tabah mengharungi dugaan dan musibah.

Datuk Pengelola Bijaya Diraja,

Datuk Ahmad Fadil Shamsuddin, berkata baginda juga menasihatkan rakyat, khususnya di kawasan rendah untuk sentiasa berwaspada dan mengutamakan keselamatan diri dan keluarga serta bersedia berpindah ke PPS dengan segera jika diarahkan pihak berkuasa.

Beliau berkata, baginda juga menzahirkan keprihatinan terhadap mangsa banjir dan meminta pihak berkuasa berkaitan khususnya Agensi Pengurusan Bencana Negara (NADMA), supaya terus menghulurkan segala bantuan yang diperlukan bagi membantu mangsa banjir.

"Baginda turut mengingatkan semua pihak berkuasa berkaitan supaya bersama-sama memikul tanggungjawab meringankan kesusahan dan beban mangsa banjir," katanya.

Terdahulu, Al-Sultan Abdullah berkenan memandu sendiri meredah banjir di Lebuhraya Pantai Timur (LPT) untuk melawat mangsa banjir di Maran.

Sewaktu dalam perjalanan menuju ke Maran, baginda menyampaikan sumbangan kepada pemandu lori yang terkandas akibat banjir di Plaza Tol Karak dan LPT.